




Kamis , 10 Desember 2020

Ogen: Lukas 22 : 17-20



Perjamuan Kudus Anak-anak ?



Engkai maka tema enda jadi sada penungkunen? Erkiteken rikutken fakta, lebih kurang 1.200 tahun gereja menaken gereja mula mula seh tahun 1215 anak-anak iijinken ngaloken roti ras anggur perjamuan kudus, tradisi enda ilakoken denga i gereja Ortodoks Timur tapi gereja Barat (Katolik ras Protestan) lanai ngalokensa rikutken doktrin siisahkan maka erti roti ras anggur berubah jadi tubuh ras dareh Kristus, emaka adi ndabuh roti entah pe anggur enggo kita menistaken tubuh ras dareh Kristus. Johanes Calvin Bapa gereja nulak doktrin enda, sabab nina roti ras anggur e eme tanda keselamatan ngenca. Tupung kita ngelakoken perjamuan kudus, roti ras anggur e tetap roti ras anggur labo lit perubahen makna entah ujudna. Saja si perlu berubah eme sikapta kenca ngelakoken perjamuan kudus, reh paguhna kinittekenta ras reh tambahna kiniersadanta selaku kula Kristus. Anem gia Calvin la ngaloken pengajaren gereja Katolik, tapi pelarangan kerna anak-anak la banci ngaloken Roti ras anggur perjamuan e tetap nge ilakoken seh ngasa genduari. Sebab nina Calvin lenga ngasup anak-anak ngaloken erti ras makna perjamuan kudus e.

I bas injil Lukas 22 : 17-20 Tuhan Yesus nuruh ajar-ajarNa bagepe perpulungen si gundari ngelakoken perjamuan kudus, e me ngaloken roti ras anggur selaku peringat-ingeten nandangi Kristus si enggo nelamatkan dosa manusia. Si enda me jadi ikuten i bas gerejanta GBKP silakoken lit 4 kali perjamuan kudus tep-tep tahunna; i bas Jumat simbelin, ndungi pekan penatalayanen, pekan keluarga ras pekan doa. Gelah min banci tep-tep jemaat ngaloken peringat ingeten kerna pengorbanen ras keselamatan sinilakoken Kristus e man guna manusia si perdosa. Dage perjamuan kudus si ilakoken i bas gerejanta, mabai kita guna introspeksi diri ras pengakun kerna Kristus selaku Juru Selamat. Makna si e me si lenga teraloken anak-anak emaka gerejanta pe lenga ngatanken anak-anak bengket ku bas Lakon Persadan Si Badia. Tole nari, kenca kita ngelakoken Lakon Persadan Si Badia, tambah min penggejapenta maka kita ersenina ertutang i bas Tuhan Yesus Kristus, teridah me arah kekelengenta nandangi teman perpulungen, tambah kehamatenta ras si ergan. Ertina lit perubahen kenca kita ngelakoen Lakon Persadan Si Badia.